

Na osnovu člana 16. stav 2. Zakona o Vladi Zeničko-dobojskog kantona - Prečišćeni tekst („Službene novine Zeničko-dobojskog kantona“, broj: 7/10), člana 11. stav 2. Zakona o koncesijama-Prečišćeni tekst („Službene novine Zeničko-dobojskog kantona“, broj: 5/03), na prijedlog Ministarstva za privredu, Vlada Zeničko-dobojskog kantona, na 161. sjednici, održanoj dana 20.09.2018. godine, d o n o s i

ODLUKU

o dodjeli koncesije za istraživanje i eksploataciju mineralne sirovine krečnjaka u ležištu „Crkvice-Kamenolom“, K.O. Crkvice, Grad Zenica

Član 1.

(Predmet koncesije)

Privrednom društvu „KOMGRAD - ZE“ d.o.o. Zenica (u daljem tekstu: Koncesionar) dodjeljuje se koncesija za istraživanje i eksploataciju mineralne sirovine krečnjaka u ležištu „Crkvice-Kamenolom“, K.O. Crkvice, Grad Zenica.

Član 2.

(Lokacija)

(1) Prošireni istražno-eksploatacioni prostor ležišta „Crkvice-Kamenolom“, K.O. Crkvice, Grad Zenica, ograničen je graničnim linijama sa prijelomnim tačkama, kako slijedi:

Tačka 1	Y= 6 495 454	X= 4 896 720
Tačka 2	Y= 6 495 408	X= 4 896 847
Tačka A	Y= 6 495 515	X= 4 896 850
Tačka B	Y= 6 495 649	X= 4 896 951
Tačka C	Y= 6 495 803	X= 4 896 880
Tačka D	Y= 6 495 833	X= 4 896 678
Tačka 1	Y= 6 495 454	X= 4 896 720

(2) Veza između tačke 1 i tačke 2 je po granici odobrenog istražno-eksploatacijskog prostora na lokalitetu ležišta „Crkvice-Kamenolom“. Veza između tačke D i tačke 1 je po granici zaštitnog pojasa prema regionalnoj cesti Zenica-Babino i zaštitnom pojasu prema Babinoj rijeci.

(3) Površina istražno-eksploatacijskog prostora za istraživanje i eksploataciju krečnjaka na proširenom istražno-eksploatacijskom prostoru ležišta „Crkvice-Kamenolom“, na dijelu parcele označene kao k.č.1338, K.O. Crkvice, Grad Zenica, je 107.200,00 m².

(4) Istražno-eksploatacijsko polje ima neposredni kontakt sa istražno-eksploatacijskim poljem za koje je već dodijeljena koncesija koncesionaru „Komgrad-Ze“ d.o.o Zenica.

Član 3.

(Ugovor)

Zadužuje se Ministarstvo za privredu da u skladu sa ovom Odlukom i odredbama Zakona o koncesijama, potpiše Aneks Ugovora o koncesiji za istraživanje i eksploataciju mineralne sirovine krečnjaka na ležištu „Crkvice-Kamenolom“, K.O. Crkvice, Grad Zenica iz člana 2. ove odluke (Na Ugovor o koncesiji, broj: 04-18-15802-1/14 od 17.12.2014. godine), u roku od 60 dana od dana stupanja na snagu ove odluke.

Član 4. **(Elementi Ugovora)**

(1) Osnovni elementi Aneksa Ugovora o koncesiji su:

- a) Vrijeme koncesije za istraživanje i eksploataciju, računajući od dana potpisivanja Aneksa Ugovora, je 18 godina, od čega do 2 godine za istraživanje, a zavisit će od utvrđenih rezervi mineralne sirovine;
- b) Za eksploataciju količine mineralne sirovine Koncesionar je dužan plaćati kontinuiranu koncesionu naknadu u iznosu od 0,82 KM/m³ čvrste mase krečnjaka (slovima: nulazarezosamdesetdvije konvertibilne marke po metru kubnom čvrste mase);
- c) Minimalna količina eksploatacije mineralne sirovine za koju je Koncesionar obavezan plaćati kontinuiranu koncesionu naknadu je 100.000,00 m³/čvrste mase krečnjaka po godini (slovima: stotinu hiljada metara kubnih čvrste mase po godini);
- d) Jednokratna (fiksna) koncesiona naknada po hektaru istražno-eksploatacijskog prostora ležišta "Crkvice-Kamenolom", na dijelu parcele označene kao k.č.1338, K.O. Crkvice, Grad Zenica, je: 10,72 ha X 10.000,00 KM/ha = 107.200,00 KM (slovima: stotinu sedam hiljada dvjestotine konvertibilnih maraka po hektaru).

(2) Koncesionar je dužan prije zaključivanja Aneksa Ugovora o koncesiji dostaviti:

- a) Uplatnicu na iznos 107.200,00 KM, kao iznos jednokratne koncesione naknade;
- b) Ovjerenu mjenicu sa mjeničnom izjavom na iznos od 164.000,00 KM;
- c) Snimak „Nultog stanja“ ležišta istražno-eksploatacionih radova sa fotografisanjem postojećih objekata u blizini ležišta;
- d) Geodetski elaborat sa identifikacijom parcela (Katastarski plan sa unesenim koordinatama istražno-eksploatacijskog polja i parcelama sa vlasničkim i posjedovnim listivima).

(3) Koncesionar je dužan nakon zaključivanja Aneksa Ugovora o koncesiji, a prije dobivanja dozvole za eksploataciju, izvršiti upis prava iz Aneksa Ugovora o koncesiji u Zemljišne knjige.

Član 5. **(Istraživanje i eksploatacija)**

(1) Istražne i eksploatacione radove, kao i sve druge prateće poslove, Koncesionar je dužan izvoditi u skladu sa odredbama važećih zakona i propisa kojima je uređena oblast istraživanja i eksploatacije mineralnih sirovina, te drugih važećih zakonskih propisa.

(2) U slučaju da Koncesionar ne otpočne sa istraživanjem i eksploatacijom u roku do dvije godine, računajući od dana donošenja ove odluke, smatrat će se da je odustao od realizacije projekta.

Član 6. **(Stupanje na snagu)**

Odluka stupa na snagu danom donošenja i bit će objavljena u „Službenim novinama Zeničko-dobojskog kantona“.

Broj: 02-18-14375/18.

Datum, 20.09.2018.godine.

Z e n i c a

PREMIJER

Miralem Galijašević

DOSTAVLJENO:

1x Ministarstvo za privredu,

1x Ministarstvo za prostorno uređenje, promet i komunikacije i zaštitu okoline,

1x Ministarstvo za poljoprivredu, šumarstvo i vodoprivredu,

1x „Službene novine Zeničko-dobojskog kantona“,

1x "Komgrad-Ze" d.o.o. Zenica, putem Ministarstva za privredu,

1x a/a.